

МАГЪДИЕВ АБДУЛВАГЪАБ.

Биография: Гаджиева Аьйшат

Ккурклиятусса Мух1адлул арс Абдулвагъаб увну ур 1903 ш. дянивсса даражалул хъудугъул кулпатраву.

Ванная ч1иви жагъил шайхту, буттал гъан увну ур ва цала уссил арснащал Самаркъаннайн, къалайчинал касму лахъхъин. Къуния мяйра шин хъуну дур вайннал уртакъну зий ца къушлий.

Абдулвагъаблун ч1ивину унава лавхъхъуну бур аджамрай буккин, чичин. Ххирасса бивк1ун бур поэзия ккалан. Хъуна хъувкун, ванал дак1нил асарду, бак1рач1ан бувк1мур, ккавкмур, бавмур балглагисса хияллу шеърирдайн буккайсса бивк1ун бур. Амма ванан цува шяэрну ч1алай ивк1ун акъар.

Шеърирду бур эшкъи-ччавриясса, багъу-бизулиясса, инсаннал сурат ккаккан дуллалисса, инсаннал дянивсса аъралиясса, бювкъу-аьй, ришкъантру дуллалисса. Дурккусса акъанугу, ванал цала шеърирдаву ч1ярусса лащанбавуртту, эпитетру, метафора ишла дурну дур.

Шеърирдаву бур диндалуц1ун бавх1усса эпитетру, лащанбавуртту: «пирдавс алжан», «алжаннул х1урулин», «ссавнил малаиктал», м.ц. Бур зайрду, зукълурду. Тамансса бур цанма ишласса узбак1 махъру, ц1арду.

Абдулвагъаб ур ч1умул, к1анттул мазрай гъалгъа т1исса шяир. Яни, чичлай ур цала вицхъиял лугъатрай, ккурккуллал ишла байсса махъругу х1ала бувну. Ванийну ванал творчестволул къимат ялавай хъанай бакъар.

Ивк1уну ур Абдулвагъаб оърмулалгу, творчестволулгу аргъирайсса оърмулул 43 шинаву (1943 ш.) Самаркъаннай, ц1аллил къашай хъуну. Увччунугу ур тиккува.

Мирзаева Шамай.

ССАЛАМ ХЪУННАВ.

Салам хъуннав ч1явусса, ссавниаргу бюхттулсса.
Ссавнил малаиктурал х1икматшиву хъуннасса.
Дуаь хъуннав къамулсса, даин ц1у хъанахъисса,
Лухчинийсса аьсавтал жухава амин т1исса.
Дукнилул дянивусса мусил ашрапи кунма,
Душурваврал дяниву загъир хъу ляълужавгъар.
Душру ххуй бай бирлиант, ят1ул мусил гъели баргъ.
Щар чана дувай чирахъ, хъурдай даин вил ч1арав.
Ардаравсса т1ут1ул кац1, вил къункьал учлай ура.
Ссавруннай бувц1у ц1убарз, вил нурданул гъели ара.
Шания лавай ивзун, шамила уругара,
Чана ц1укул парливу ина ххал шайрив ккаккан.
Шагъра ххуллийх нанисса буци ххуйсса къкъукъухъхий,
Вила нурданул асар цаманан хъун мабик1ав.

Меджидов Абдулмеджид.

ЯХ1 БУВА НА УЧ1АННИН.

Агъ, ттул шаншинал х1авий,
Махъния буллуссия,
Вивура рух1 дуссаксса
Чил къахъунна увкуну.

Лелуххину лехханна,
Зунний кюру буванна,
Ттул аьзизсса яру хху1,
Хъаттирдалун бакъинна.

Ина ттухъ увкуссия
На барзра, ина баргъра,
Ц1урттаца к1ай укунма,
Лич1и бан къабик1анну.

Бухттул барзунттай, сулий,
Ях1 бува на уч1аннин,
Ардарав оьрч1и т1ут1ив
Къуп1авату хъячиннин.

Магдиев Магомедхан.

Ттул ялтту нанисса инкбал лелуххий,
Ттул ссаламгу буси питтагъли душнихъ.
Анаварсса мурчан маз к1улссания,
Ссалам гъан бавияв бак1щарний душнийн.
Диянсса к1улния к1а ттурлу вич1ан,
Ссайгъат гъан бавияв, хъама къаитан.

Гужиев Нурулла.

Барзунттал хъач1-бак1айх
Ттурлу дирхьукун,
Пашманшиву дагъай
Ттул дак1нивунгу.
Щюллисса къурувсса
Т1ут1ив ххал хьукул,
Яру бур к1унт1ай т1ий,
Тай виха лахълай.

Ларч1сса мюрш гъаравух
Баргъ ч1алач1иний,
Инагу бац1ара
Ттул яруннил хьхьич1.
Вин къарал буллай бур
Эшкьилул яру,
Ина кюру къабан.
Чил къанчуллулу.

Самадова Оксана.

ОМАРХЪАЛ АЪВДУЛЛАГЪ

БИОГРАФИЯ: *Уч. Сулейманов Арслан.*

Оьмархъал Аьвдуллагъ увссар малланал кулпатраву Х1Х аьсрулул 40-ку шиннардий Ккурклив.

Дагъусттаннал мадрасарттавугу дуклай ивк1ун, му увхссар Щурагъсса бусурманнал школалувун, цивугу аьраб ва оьрус маз ххуйну лахъхьин байсса.

1865-ку шинал лакрал дуклаки оьрч1ан Оьвдуллагълул оьрус мазрая таржума бувну бур «Щин ва гъава ва миннул дахханашавуртту» т1исса лу; 1867-ку шинал лакку мазрайсса «Арифметика». Мира шиннардий щаллу бувну бур лакрал магьрал ва балайрдал сборник.

Ва хъанай ур элмурдал гъанурду бувч1ин буллалисса цалчинсса учитель. Гъумучиял хан ва дин сававну Лаккуяту мунан лихъан багъну бур Ттуплислив. Аьвдуллагъ Кавказуллал зунттал управлениялуву таржумачину зий ивк1ун ур, яла «Кавказуллал зунттал халкъуннаятуса сведениярттал сборникрал» редакциялул сотруднику хъуну ур. Цалва статьярдаву Аьвдуллагъ буслай ур лакрал тарихрая, этнографиялуя ва культуралия.

Ивк1уну ур Закаталлай.